

Gobierno sosteniendo Aruba Growth Fund den corte awe

ORANJESTAD - Gobierno di Aruba a keda sumamente desapunta despues di a tende tocante e acuerdo di benta entre Radisson y RIU, specialmente despues cu recientemente a muestra con Carlson Group a sostene maneho di Minister Oduber pa loke ta All Inclusive na Aruba y a opta pa bende e edificio cu Aruba Growth Fund.

Diabierna mes Minister Oduber a reuni cu representanten di Aruba Growth Fund y den fin di siman cu ATA, ATIA, AGA, AHATA y otro partnernan pa cu nan posicion den e acuerdo di benta aki. "Mester bisa cu e consenso ta cu mester haci lo

posibel pa evita cu e fenomeno di All Inclusive sigui expande na nos isla, especificamente na e parti hotelero, algo cu Gobierno ta para totalmente pe tambe, no for di awor, pero ya caba pa algun aña y hasta a publica oficialmente su maneho y esun di Minister di Asuntonan Economico."

E maneho

E maneho aki cu a wordo publica den diferente corantnan di nos isla dia 5 di februari 2013 ta bisa lo siguiente: Durante e ultimo añanan Gobierno di Aruba a considera e introduccion di un moratorio pa loke ta construccion di proyectonan di hotel, time-share y condominio. Como antesala na e moratorio,

Minister di Turismo, Labor y Transporte a establece un maneho pa restringi e expansion di tal acomodacionnan di hotel y na mes momento permiti e crecimiento den alocacionnan geografico specifico (p.e. San Nicolas) y pa tipo di propiedadnan specifico (p.e. boutique hotels). Minister di Turismo, Transporte y Labor pa tal motibo ta anuncia cu e ta expande su maneho riba acomodacionnan pa inclui e siguiente: Companianan di maneho di hotel (nobo of existente) cu ta desea di introduci un operacion di hotel all inclusive of operacion di condominio mester di aprobacion prome di e Minister di Turismo, Transporte y Labor y di e Minister di Asuntonan Economico, Asuntonan So-

cial y Cultura.

E maneho aki a wordo publica na Ingles pa tur compania hotelero por a compronde e maneho, cual ta sigui vigente na e momentonan aki y cu a wordo sosteni pa 21 Parlamento recientemente. E ultimo aki a tuma luga durante tratamiento di presupuesto 2015 unda cu un mocion a keda aproba unanimamente pa regula maneho di propiedadnan all inclusive. Igualmente por menciona cu ATA a traha un rapport pa mira e consecuencianan di mas all inclusive si of no riba nos isla pa asina e concepto di legislacion wordo presenta na Parlamento, manera nan a pidi den e mocion. Intencion cu Gobierno tin ta pa hinca esaki

den un clausula di permiso.

Den e cuadro aki y teniendo na cuenta bienestar general di nos pais, Gobierno di Aruba a tuma e decision di bay corte pa sostene Aruba Growth Fund y purba evita cu Radisson por bira un otro propiedad All Inclusive.

Mester keda cla si cu Gobierno semper ta respeta negociacion entre dos partidonan priva, pero den e caso aki, motibo pa cual ta participa ta bienestar general. Tambe mirando cu e dos partidonan tabata sa di e maneho cu tin pa loke ta propiedadnan All Inclusive y ademas a wordo poni na altura personalmente dor di Gobierno riba esaki. A pesar cu nan tabata sa di esaki, nan a continua negociacionnan. □